

戒菴老人漫筆

同治二年二月十五日湯金鼎刻

壬午年庚申九月九日

戒菴老人漫筆卷之三

壬午年正月二十日又同刻

江陰李詡

江陰李詡

皇明天下郡縣戒石銘乃宋熙陵朝節出蜀檮
杌中所載蜀主孟果文四句耳自宋迄今因
而不廢果全文不傳今錄之銘曰朕念赤子
肝食宵衣言之令長撫養惠綏政存三異道
在乙絲驅鷄為理留犢為規寬猛得所風俗
可移無令侵削無使瘡痍下民易虐上天難
欺賦役是切有國是資朕之賞罰固不踰時

爾俸爾祿。民膏民脂。為民父母。莫不仁慈。勉爾為戒。體朕深思。

摘出四句。筋之天下教了。

張華博物志。世止十卷。事多雜出。諸書或本書久失。後人掇拾為之耳。又云。原四百卷。武帝俾刪其繁。存此。亦不應倍去。若是之懸絕也。靈芝圖。曾見五采妝繪一冊。名狀多異。產地迂僻。道家所造也。詭妄不可盡信。

杜子美詩。震雷翻幕燕。驟雨落河魚。姚合詩。驚飈墜隣果。暴雨落河魚。皮日休詩。高風翔砌

鳥暴雨失池魚雨下則魚隨水而去驗之不
謬

墨子書稱夏后開開即啓也與史記稱微子開
同避漢景帝諱則墨子疑漢人所譔非本書
元史速不台雪不台二傳異名而事頗同文有
詳畧耳觀言俱七十三卒俱謚忠定其謬審
矣第十八卷有完者都第二十卷又有完者
拔都名既祇多一字履歷復不大殊見的
王質景文云渾淪以前其畧見於釋之長含經
開闢以後其詳見於邵氏之皇極經世

柳之懷遠產香藤葉大如掌多刺鑽蹠紋齒巨

林產多於山林紆攣之處歲久色微黃曰藤

香或深藏巔岼巨石攖路人跡不到霜饕雪

虐積以歲月皮肉俱爛赤心如鐵謂之降真

香本草云出黔南拌和諸香燒煙直上天召
得鶴主天行時氣宅舍怪異並燒悉驗

大唐西域記婆羅痾斯國有隱士求仙得一烈

士令終夕無聲云云與幽恠錄杜子春事甚

類

大學或問曰善必積而後成惡雖小而可惧漢

昭烈云勿以惡小而為之勿以善小而不為
書曰爾惟德罔小萬邦惟慶爾惟不德罔大
墜厥家即易繫辭所謂善不積不足以成名
一節之意

唐釋道宣廣弘明集載謁大慈恩寺詩一首作
今上則高宗也今載太宗文皇帝集中萬仞
集作百團影集作圓綺霞集作霞綺瓏帳集
作籠

古樂府雄兔脚撲檄一作撲雌兔眼迷離王充論

衡兔舐雄豪而孕及其生子從口中出觀此
二說則兔未嘗無雄也

王達善撰鄭所南先生傳云先生名所南字思
肖號憶翁福州人宋末太學生也博學多技
能為文不以草而豪恠可愕又善畫蘭蘭成
即毀之人求之甚靳值元氏位中國坐必向
南人詢之則曰夷狄入中國為萬世之大變
聖人書狄以為大戒今日士大夫恬不知恤
反為之競吾不忍也當世無不憾之貴要者

求其蘭尤斬弗與庸人孺子頗契其意者

反與弗計然亦不盡土人詢之則曰一片中

國地為夷狄所得一云土為番人奪去吾忍盡耶凡平

日所作詩多寓意於宋若題鄭子封書塾曰

天垂古色映柴門千古傳家事具存此世只

除君父外不曾重受別人恩譏宋之臣子復

仕於元也若題其畫蘭曰求則不得不求或

與老眼空濶清風萬古譏一世之士無足當

其意也圖繪寶鑑云工畫墨蘭嘗自畫一卷長丈餘高可五寸許天真爛熳超出

物表題云純是君子絕無小人寓意編載所
南墨蘭自題詩云一國之香一國之馨懷彼
懷玉於若題其畫菊曰花開不並百花繁獨
楚有光若題其畫菊曰花開不並百花繁獨
立疎籬趣未窮寧可枝頭抱香死何曾吹墮
北風中自謂志節不為元氏富貴所奪也若
題其畫像曰不忠可誅不孝可斬敢懸此頭
於洪洪荒荒之表為天下不忠不孝之榜樣
譏夫忘國而事仇者也平生寡慾而好遊凡
遇窮山大澤必彌日忘返咄咄書空心與口
語人爭視之彼則蔑如也著書甚多行於世

者有太極濟鍊文一秩多隱語艱苦難讀莫
知所歸書後題二十字云大無工十空經臣
漚血三斗書此後有巨眼者當識之好事者
或藏於家竟以壽終塋於姑脊之西所謂所
南者以南為也憶翁憶乎宋也思肖都思乎
趙也凡其為人類若此脩宋史者遺其人故
宋史無傳余故惜而傳之云論曰蜀孟昶侈
肆之後豪右爭相夸尚石恪生於其時盡殊
形詭狀以辱之彼所南者無乃恪之徒與昔

王褒痛父非命終身不東向而坐夫君父一
道也彼所南者抑又褒之徒歟嗚呼自有天
地以來所以彞倫不墮者以有節義為之閑
也通圓者哂其狷介又孰知有所不為者亦
聖人之所取乎

遂昌山樵錄云客吳下有田
寄城南報國寺吳人利其錦

錢集行
于世

先儒言句音當俱去聲幹當事也每言合下如何

如何合下字猶今言一落之意朱子有云丁
一確二乃的當之意今俗語猶然程子凡言

大小大事猶言多小大事也言體當二字
方俗之言體驗幹當之謂

衛公子州吁左氏公羊及詩皆同惟穀梁作祝
吁此音相近而然如呼鷄之聲州之為祝也
事文類聚以令尹子文為縣尹事用誤矣

昌黎集有題千葉桃花詩即今謂之千葉

宋侍郎臨安俞公烈登淳熙初第累遷中書舍
人會宗室希閭由官所奔喪歸誤伐韓侂冑
祖隴傍竹為造墳具法司承侂冑意使援持

伏竊盜例公曰壙墓非人室比兼未嘗持伏
今追兩資送州安置罪涉太重夫有官之家
猶得贖矧希閭在屬籍特不得贖乎遂獨以
園止罪伐竹者佞胄痛緹之尋族言事者論
云此事宋史所不載余見于王梧溪詩集中
佞胄之損俞公之賢皆世鑒也

朝廷用筆每月十四三十日兩次進 御各二
十管冬用綾裘管裏襯以綿春用紫羅至夏
秋用象牙水晶水盆等件內府臨時裁出製

造弘治時吳興筆工造筆進

御有細刻

標記云筆匠施阿牛

孝宗見而鄙其名內傳以小名對勅易名曰

施文用至今猶然右二事吳興筆工張永賢

說

太宗殺方孝孺親族八百二十口

何遜至北宜成世

梧溪集載梁友直遺文俞之近遺事皆邑誌所

不可遺者梁文云江陰王庫使家藏黃筌雀

哺鷦卷後有後村詩跋嘗聞古院畫率有名

義是三崔者。殆取詩禮春秋傳三爵之義與。
荃蜀人。故云浣花溪耳。雖然姑置老荃而論。
後村方宋氏叔季時。王臞軒劉後村文章聲
錚錚相頡頏。臞軒元宵詩首押枰科末押民
膏。後村此崔詩和韻乃竄入鷓鴣王以辭賦
高。第二人及第劉以名臣子孫有文辭賜及
第。真西山為中舍舉之。自代皆非不諳韻者。
直狃於閩人語言聲音。不覺跌宕。當不以過。
余既贅論。且贅贊云。觀崔哺鵲。可以知仁仁。

于曷知于雀之身。雀知有子。子知有母。鑽焉
思哺食在母口。嗟彼雀矣。以鞠以育。矧伊人
矣。孰無天屬。幼資其親。長養其親。天屬至親
最哉。世人。庚辰三月。三山梁益俞事云。先生
姓俞。諱遠。字之近。號空谷。江陰鳳歌。今誤鄉作戈
人也。以儒起家。至先生貧。隱居教授。能行古
道。毗陵孫岵以先世舊。依先生。待如近。齋卒
殯焉。頃年疫。傭奴病乞歸。先生曰。慎無疑。疫
氣相染。其善調護。踰旬死。時兵興。山林盡赭。

人死多委之壑。或以是請先生曰。生盡其力。死棄之溝中。不義也。特為棺窆。歲暮春里萌。昇木偶神。邀井落間。至先生門。適所昇重而止。昇告家姥曰。神靈報施。影響捷宜。急祭燎旗下。否則殃及矣。姥笑曰。木偶何能為主人。歸吾家爨下物耳。衆愕眙去。族姪裕親歿。有佛者以佛事為解。裕毅然曰。吾諸父嘗謂形神既離。地獄何有。今乃自誣親有罪。不孝孰甚。佛者慙而退。其善行及人。率類此。先生骨

貌清卓類有道者。長於古文。尤嗜詩。亂中吟詠不輟。嘗自叙詩曰。蟲之夢夢。鳥之嚶嚶。機動籟鳴。豈得已而不已乎。不得已乎耳。予以見其出乎性也。壽七十二。子熊孫庠序。李靖行雨事。言馬鬣一滴。則地下雨二尺。今凡小雨沾塵。或寸許不齊者。何以施馬鬣之滴也。

近世學書者。知有宋克體。不知有章草。然非重頭曲脚之法也。善隸書者知之。

杜無海棠詩者以毋諱故耳東坡之咏妓李真
乃一時之失言也西郊野叟詩話載之以為
美談何耶

漢文帝時宦者趙談史記作趙同者蓋避太史
公父諱言與談同名耳故曰同今漢紀猶作
趙同誤矣

晉多用信字使人也世說及二王帖中可見今
曰書信音信獨指簡札非矣

唐詩多言至竟如云到底也杜牧云至竟息亡

緣底事至竟江山誰是主之類

誌中有爵者宜稱塚無爵者稱墓有爵及尊貴者稱公無爵者咸稱君

張商英序黃石公素書言得於子房塚玉枕中上有秘戒不許傳於不道不神不聖不賢之人以道與神加於聖賢之上必是道家所托非吾儒之見也

驢馬食管仲三五日易肥駟僮之欺人多用此一云貫衆

今人家基內簷頭下溝皆稱洋溝其名甚古崔
豹古今註云長安御溝謂之楊溝謂植高楊
于其上也一曰羊溝謂羊喜抵觸垣墻故為
溝以隔之故曰洋溝也有以屋下者為陰溝
簷前者為陽溝甚顯
甘蕉出閩中以糖漬之可以寄遠形如鎖陽而
氣近黃精味酸

吳人悼陸全卿冢宰坐寧黨詩曰子規聲裡夕

陽微何事先生懶見幾雲夢竟成韓信縛鱸
魚空待季鷹歸功名到此分成敗史筆憑誰

定是非寂寂朱門春去也楊花燕子任爭飛
或謂唐伯虎作

李北海學王而飄逸者也蘇東坡學顏而飄逸
者也

唐李涉題字秀才櫻桃詩曰風光莫占少年家
白髮殷勤最戀花今日顛狂君莫笑趁愁得
醉眼麻茶今人欲睡眼將合睫而縫細者曰
麻茶不知作何寫偶觀王荊公百家詩選李
涉詩得此二字今物之擁腫者俗曰直籠

上聲

桶常居安梅磧詩話記鄭安曉丞相未貴時
賦冬瓜詩云剪剪黃花秋後春霜皮露葉護
長身生來籠統君休笑腹內能容數百人即
此籠統字今人以虛罔不實而斥其妄行者
則曰趙爾雅休無實李郭璞云一名趙李蓋
無實者虛也疑即此趙字

西銘總論正如杜順作法界觀樣法界觀云華
嚴大教浩博難名杜順和尚文殊應身以自
智見華嚴一真法界總該萬有即是一心其

中諸佛衆生若國土若莊嚴義境無量於
量境集其義類總舉色空理事為例束為三
重觀門。一曰真空法界。二曰理事無礙。三曰
周遍含容。若達此三門則法界重重縱橫達
矣。

包犧因燧皇之圖而制八卦神農演之為六十
四。此淳于俊對高貴鄉公之言也。漢魏間人
士守經甚嚴。斯言必有所本。陸儼山傳疑錄
云。

洪武十九年

御製中山武寧王神道碑文後

有跋云臣惟古功臣之薨壙有誌墓道有碑禮也然自唐以來皆命詞臣為之惟我

聖王芟夷群穢混一區宇雖股肱爪牙非止一人而中山武寧王實元勲之首南收吳越北定中原東平齊魯西入關陝大抵皆王之功今其薨也聖上以王豐功偉績始終

本末非詞臣所能周知故親筆之刻置墓道自古人君禮報功臣未有若斯之盛者也

臣等不敏。幸得同侍。經筵。欽覩。御製。不勝感激。流涕。謹拜手稽首。書于碑文之左。
文淵閣大學士奉議大夫臣朱善。承務郎左春坊左贊善臣劉三吾。承務郎左春坊左司直郎臣汪仲魯。翰林院侍詔臣沈士榮。孫大雅。謹書此。成化二十二年丙午冬。其五世孫徐鉞所刻以傳者。今不可多見矣。且孫公吾邑之先輩也。謹錄之。

正德時。邑庠蔣一龍。為邑父母萬公所愛。適試

于按院經書論外又出一蔡氏父子相軋題
作判其判曰周公相而伯禽封忠輸內外鄭
桓卿而鄭武繼職善開承故挾篤棐之猷何
嫌夾輔恢世濟之美豈厭同朝德乃下哀恩
斯冒濫霍光操廢立之柄進禹司徒安石執
變法之權推雱侍講樹黨一門竊官再世是
固昧君臣之義然猶全父子之恩若石厚之
輔州吁石蜡以先臣而見秘懷光之叛唐德
李璣以入侍而告謀則義有重於朝廷恩難

無於骨肉今也蔡京以諂佞得政既非穀貽
蔡攸以權勢超遷尤非武踐乃者位漸肩端
忌由心出邸館自開各納買官之賄客賓分
附頻生奪要之疑震用事而上九當退於無
為京猶戀位乾居尊而六子未承乎幹蠱攸
敢同和既不識父子去就之節謂宜薦僚友
協恭之義蔡氏均有罪矣宋室亦曰殆哉試
後寫卷呈于萬公閱至辨便頓足曰弔萬玘
一年豈能作此一句浮白賞之至醉其歡愛

邑俊每每似此一龍父舜文本王姓居城東
因父鞠于蔣靜齋而仍其姓焉一龍父子皆
吾邑高才生而卒皆不得一第不識造物謂
何。

今人謂淫於色者為風即馬牛其風之風
格致餘論辨千金方房中補益為非此垂戒立
法為中人慮耳。即暴者不可以主兵貪者不
可以主財之意。若仁以不殺為威廉以不貪
為寶亦無害也。所謂有伊尹之志則可。

今人眠小兒竹籃名搖籃郭晟家塾事親曰古
人製小兒睡車曰搖車以見搖則睡故也蓋
搖車即搖籃今別有綳車之制綳一作綁音榜
此字玉篇廣韻俱無乃出無疑韻中蓋後人
所造也

石季倫崇王昭君詩序云匈奴請婚於漢元帝
以後宮良家子昭君配焉昔公主嫁烏孫令
琵琶馬上作樂以慰其道路之思其送昭君
亦必爾也熟叅此序乃知昭君出嫁之時未

必以琵琶寄情特後人想像而賦之耳此范
晞文語最足以祛衆蔽匈奴地有黑河青塚
在黑河之旁夜四鼓時有氣直上江陰萬戶
完仁山云古今人信琵琶而不知其訛言青

塚而不詳其自余故拈出

呼韓邪單于初請
為漢婿及死子雕

陶莫皋立復妻昭君生二女一為須卜居次
王莽時入侍太后失節如昭君蓋無足道者

池州九華山江南勝地山中有奇花歲歲則有
護花鳥鳴焉遊人欲折者鳥則盤旋其上鳴
聲云莫損花莫損花無錫倪容舉人如泉嘗

居山中月餘、親對徐納齋尚德說得聞、

論語曰不撤薑食又曰不多食謂每食適可而止、非言薑也、事文類聚蔬菜門引孔子不撤薑食不多食而題云薑不多食連上文言之謬矣

常州周約菴金、曾鎮撫延綏言三邊寒甚、遼東第一、大同次之、真有墮指裂膚之慘、屋下皆有霜、蓋氣透徹故也、人出軍有受寒者、扶至家、漸以溫物食之、若驟以火、則皮肉俱爛、曉

開城門、不知者、誤以手候其鎖、則皮皆去如
灼、蓋醫家亦有寒極似火之說。西邊有火
炎山、韃靼腸極細、如猪腸、人身瘦長而濶
膀、不畏死、得勝則唱、敗則哭、韃婦至中國人
戲弄其乳、則喜、以為是其子也。至隱處、亦不
為意、惟執其手、則怒、謂執手為夫婦動挾刃
刺其人。馬瘦、見肋骨、蹄甚薄。至中國養壯
而蹄厚、則不善走。極有駿異者、欲入寇、則羈
餓四五日。

撫州王書客自大同來見達子八
萬虜大同鄉埠而去亦言馬餓七

陝西出黃鼠、味佳、設宴珍饌。

出黃鼠

身尾似鹿、而角似羊、肉甚美。鯉魚甚肥、腹

中多脂、形如南方者、而重三倍。半翅鳥、信

大如鴿、鶉、肉味亦如之、性極癡、又謂之半癡

亦曰痴、半斤、好視紅物、飛不遠、輒下、獸人著

紅裙襖、以誘之、則近身、凝視不去、故可得。

韃人稱中朝。皇帝為罕、蓋胡人聲重而疾。

古云可音汗、寒音近罕耳。有猴小如拳、人

家畜者、飲水漸大。邊上虎極大。達達驪

馬之外亦乘牛具鞍行走 達達稱中國官
府為阿法 邊上老鴉紅嘴紅脚剪舌教之
能言亦如鵲鵲 余謂周公因縣父母石首
劉公見托請文之故坐間談及邊境且出示
三邊圖凡所聞者聊識如右

隣邑東橋徐氏世敦禮讓近後裔衰薄有老儒
邵夢嚴熊者亦被其陵竄好事者以詩唁之
漁梁溪上水東之魯道于今一變齊押闔場
中多智伯陽春調裡少鍾期捐階不是徐行

日。仇餉渾非亟拜時。八十年来函丈老。月明
無可一枝棲。夢嚴家君童穉時。師也記其獨
對黃菊一絕云。菜羹麥飯午陰斜。飽看中央
正色花。非是無心近紅紫。清貧何地著繁華。
其著作多散見縉紳集中。

牛首山塔影在僧室中。開門暗映卓前懸。紙或
以白衣承之。影小而倒黦黦。可見室與塔甚
近。非相值之地。不知何故。

嘉靖十五年丙申歲秋。邑中大街虹橋溝東居

民鑿地得石、乃宋末恭帝德祐年間子撰父
壙志、為余業師沈養吾所得、備錄于左、王君
錄叅從事壙志、先君諱建大、字直方、氏王、曾
祖諱奉、議郎、累贈中大夫、妣朱氏、胡氏、俱令
人、祖寧、中奉大夫、直徽猷閣、司農少卿、贈正
議妣、傅氏、韓氏、俱碩人、周氏、宜人、父壽、朝散
大夫、通判泰州軍州事、妣趙氏、封宜人、始卿
祖更英、蕩歷清貫、聲光赫奕、至先君生、眉目
儼偉如神、幼穎異、力學、諸父見聞、重染、熟知

先朝文獻淳祐己酉以百篇預卿薦寶祐乙卯通判官無為類集少卿笑菴文藁將鋟梓先君校正彙次計使陸公景思見之與語喜其儀語英氣嘆曰燕趙奇士非虛言蓋王氏世趙人而江陰則僑寓也丁巳理宗明堂禮成先君以通判冢嗣奏補將仕郎未幾丁宜人艱繼通判艱服闋授迪功郎監通州支鹽倉度宗御極加脩職郎邊賞循從事郎居官會計當有能稱制使李公庭芝印公應雷皆

舉陞剡、秩滿、印公留權海陵、準遣、繼辟安東
錄叅、未赴、感疾歸、始舊居鬱攸、通判雖葺數
椽、未完、雁行衆、不忍析、至是買廬虹橋巷、休
假歲餘、疾革、謂弟子曰、自樞祖至先人七
世、有列于朝、吾幸蒙先人遺澤、志非不如昔
人、學非不如今人、厄于數、莫克振、作讚一絕
逝、時咸淳甲戌六月十三日也、先君生嘉定
乙亥八月二十一日、享年六十、娶永嘉趙氏
希澳女、先十五年卒、子男一人、伯熊、女五人、

長適同郡杜化孫次佛娘、宜娘、安娘、住娘俱
未行、伯熊卜嗣、歲德祐改元、三月十一日壬
午、安厝于昭聞鄉綺山之原、祔先妣域、從治
命也、不肖孤伯熊、投淚叙次、梗槩識諸墓、奉
議郎知江陰軍江陰縣事、兼提舉常平司主
管文字、賜緋高純厚填諱、

杭州俗呼黃矮菜為花交菜、謂近諸菜多變成
異種、民間常以此詈人如魚中之鯢也、土俗
多南渡遺風、賣冰者叫大枕、俗音雪以大雪收

者佳糴乏麻者叫何何舊姓何者曾鬻此故也

取蟾酥法將活蝦蟆眉稜上用手裏捻油紙上或是黃素葉上便有蟾酥用竹篾青刮離紙葉上便於原刮竹篾上插在背陰處經宿酥自然乾收用之

丹陽蘇頌子容宋皇祐間進士累官門下侍郎以父紳嘗直史館極言時政與梁適同在兩禁人以為險詖故語曰草頭木脚隔人倒卓

章頭木脚者木脚是梁字而章頭則蘇字之

隔人倒卓者傾險之甚也

蘇紳梁通謂之章頭木脚其害在士

大夫薛居執胡槩謂之章頭古天下善其害在民

集覽遂謂熙寧中

頌請以此語刊附國史此說非也且云為父
辨謗去之可也豈有反求添入之理蓋刊有
二義有利落有利入此乃因國史有此語請
於神祖而刊落之即詩序中所謂則亦刊而
去之是也

禰衡作鸚鵡賦張華作鷦鷯賦皆有超然遠害

之意。使能踐之。何後患之有。是所謂不能讐其言者也。

常熟吳文恪公思菴先生。送外孫錢昕一絕句云。阿昕今喜赴科場。南北奔馳日夜忙。昔日曾聞先輩語。一憑陰德二文章。蓋惡昕父多行不法。作此以教之。昕後卒為良牧。伯能不負公教。余大母嚴乃文恪之外孫女也。耳熟之。嘗以授誦。且述當時錢捷後。謁見命執掃。除以折其少年英氣。曰。吳家外公錢家小哥。

教者真是能教受者真是能受汝孩兒嘗知
樣子嗟嗟今復可得此耳提哉其詩語尤是
與今日士子下一頂門鍼也

茅山華陽洞石崖上真書三大字相傳米元章
書路傍洞泉二篆字龕石中玉柱洞中有石
柱懸空四周可轉似滴乳結成喜客衆人至
環石欄羣衆拍手則乳泡泛起玉宸觀大栢
根幹纏紐被火餘蘂猶佳顏魯公四面碑張
從申三絕碑俱存大茅峰徑路九灣十八折

祠宇官前九杉高大靈官所掌玉印水蒼色
方二寸有柄文云九老仙都君印篆畫八疊
制作尚廉巖不甚古

常熟李文安公傑五歲時在堂中圍柱戲跳見
者以手圍庭柱團團轉試之隨應聲曰脚踏
樓梯步步高又有出櫓人二字者即對以扇
子嘗夜坐庭中從兄指紫薇星令屬對應曰
黃道日登第後入館賦禁苑聞鶯結句云君
王厭聽如簧語莫向金門弄晚聲人多傳之

靖壬寅冬余季弟家後濬河得一塊古墓甌
余以水漸漸浸洗之字稍可辨然漸滅處甚
多不可讀僅見首行為瑯琊王氏墓誌銘無
書撰人姓氏乃唐大中三年間葬也惟銘完
好錄之銘曰生居幽壤寂靜自然其生也天
其死也天赤岸之原千秋萬年其缺甌八百
塊亦載於誌中余里名赤岸縣誌作斤字余
家先世所書有兩從者今定以為赤云

山茶一名海紅花金鳳花都下稱為海囊蜀葵

浙江寧波稱為犬紅花

王守溪曰曆書有白黑綠碧黃赤素此河圖數也河圖之數戴九履一一為白九為紫左三右七三為綠七為赤二四為肩二黑四碧六八為足白故陰陽家一六八為白二黑三綠四碧五黃七赤九紫

成化中河南鄭州舉人黃某出宰常熟鄉先生錢東湖以賡唱相厚偶談及鄉土對錢曰敝地風俗惟細民仍舊原自有矜嚴禮法之家

即一城如此者凡十三家。屈指數之盡矣。黃
湖接聲曰。連老父母家十四家。黃茫應曰。正
是正是。學生蹉數也。聞者莫不絕倒。近時有
論鄭風者曰。夫子但放其聲。朱子解詩不宜
槩從淫例。由此觀之。豈其然耶。

黃鉞字叔揚。蘇郡常熟縣人。少明敏。好學。家無
藏書。鉞日遊市肆中。見書。不問古今。即借觀
之。或竟日不還。是時天下新定。重法繩下士。
不樂仕。人文散逸。詔求賢才。悉集京師。鉞

父見其子好學甚恐為郡縣所知數懲之不能止家有田數十畝在葛澤陂因令督耕其中鉞至陂無書讀託市鹽酪率一二日即入城從其友人家借得書道中披覽比至陂輒盡每以為恨楊渙者元末隱士也嘗避雨泊舟鉞舍傍窺見鉞持書倚簷讀不輟聲乃就視之曰豎子好學至此哉日能讀幾何鉞答曰苦無書讀耳過目不能忘也渙曰我有書在洋海店去此不遠豎子能從吾游乎鉞喜

再拜。即從溪入舟。至其舍。與數冊書去。自是
數數來易。溪恠其頻。舉所借書問之。悉記憶
無忘者。溪大喜曰。吾棟架書不下萬卷。不能
舉付汝。汝當就吾舍讀。因令其子福同室而
居者三年。遂盡其書。縣聞之。併辟福賢良。溪
怨之曰。吾不幸遭世亂。家破族散。今獨携一
子。耕讀遠郊。以畢餘生。以子好學。盡以藏書
奉觀覽。柰何不自韜晦。卒為人知。貽累我家。
鉞徐曰。無患。當為公說尹罷之。乃教福結束。

如農夫。且曰。即尹有問。子但操吳音。勿有所對。福盡如錢教。因同詣尹。曰。錢與福共筆硯數載。知福為深。福才能問學。並出錢下。而福父老身病。不可遣行。即行。不足以應詔。君且得罪。尹心知其詐也。不得已。乃獨遣錢。以生負除。宜章典史。洪武二十二年。已卯。舉湖廣鄉試。明年庚辰。第進士。授刑科給事中。陞戶科左。又改禮科。居職封駁甚多。辛巳。即建文三年以父喪歸。其所厚翰林侍讀方孝孺弔之。

介左右密言曰。北方不靖。蘇常鎮京師之左
輔。應北之右臂也。君吳人。朝廷之近臣。今
雖去。當有以教我。曰。三郡惟鎮江最為要害。
守非其人。是自撤其藩籬也。童俊狡獪。不宜
獨任。吾近見其奏事。上前視遠而言。游此
其心不可測也。蘇州知府姚善。忠義激烈。有
國士風。必能獨當一面。但仁慈有餘。而御下
太寬。此治郡之良才。恐不足以定亂耳。然國
家大勢。不在江南。必待我馬至此。亦已晚矣。

孝孺乃因鉞附書於善。以忠孝相勉。期戮力
王室。以濟時艱。善得書。與鉞相對慟哭。以死
自誓。鉞至家。因父殯在陂上舊廬。即往居之。
足跡不入城邑。有御史按部至常熟。問曰。此
有黃給事何在。邑中無知其家者。一老人居
與鉞隣。知引之。御史舟至陂。時方暮。秋收禾
堆積村巷。路又泥淖。御史乃徒步抵其舍。鉞
從幕中對語。移日。家人以貴客至。欲割鷄具
饌。鉞驚曰。豈有居喪而殺鷄禮客者耶。卒以

葉弼對食而別。壬午靖難師日促。姚善受
建文君詔。總率蘇松常鎮嘉興五郡兵馬勤
王。善以書招鉞。以親喪尚在殯。請即日營葬
畢事。乃可趨命。既而童俊果以鎮江降。

文皇帝正位。詔暴姚善罪狀。收之。善麾下許
百戶。惟權詐。因得親善。縛善邀賞。鉞聞之。慟
哭。遂絕食。閉目。三四日死。悉以家人救免。或
傳言善款服。上赦其罪。復瞠目曰。吾知善
為人。決無二心。吾且少俟之。善事定。吾獨死。

未晚也。脫果不死。吾將下報希直。希直者孝
孺字也。遂復稍稍食。其年七月十日。善就刑。
報至。鉞起登琴川橋。西向再拜祠而哭之曰。
吾與君同受國恩。不幸有國難。義同許身。君
與希直同死國。吾忍背義獨生乎。祠畢。給家
人歸祭具。遂從容整衣冠。奮身入水死。時收
善黨急。軍士縱橫郡邑中。且訛言將併錄鉞
家。親族悉驚伏。福乃具棺衾。晝夜泣橋側。百
方求其屍。不能得。更數日。屍忽自出。立水中。

福慟哭。親抱而起。易其衣。體猶不潰。敗竟成。
禮葬之。復吊以詩曰。江風夜夜鼓洪波。江雨。
朝朝濕薜蘿。九辨不回哀郢志。三軍難奪採。
薇歌。手披宿草狐踪滿。夢落堊梁月影多。誰。
謂百年臣子恨。獨聞野老泪滂沱。按此。楊五。
川儀從餘慶書院僧本清疏簿中得所記黃。
黃門事實。又得殷學究書卷面二半幅。所載。
遺跡。合而詮次如右。黃公著作。民城無傳矣。
附錄于此云。鐵自成。章時與我貽穀。楊兄同。
事筆現探討古今風晨兩夕靡不相俱。蓋同。

寢憂者將十載兄清才厚德十倍于鐵特以
尊翁蘆歷老先生年週甲子不樂仕進故前
後與鐵聯名而辟於縣者三舉于郡者再皆
以病疾辭免鐵不才叨拜官諫垣茲以使事
過吳詔特許歸省兩中過尋舊游因共榻
累名追談往事百感俱作嗟嗟楊兄今之大
賢人也何以親老而不仕今親則終矣向以
世亂而道屈今時則泰矣尚戀戀湖山將遂
老焉而鐵忝司獻納又不敢故違高志以薦
揚於上論其極致吾二人皆不能無罪焉
類別聊賦此以贈出處殊途隱顯異致又不
知兄之所以教我者何如也愛子疏堂靜
不塵扁舟真厭往來嫌如蘭自覺心情古似
夢還驚歲月新架上經書千軸富窓前花木
一林春嚴陵自是輕台
是相對慙為獻納臣

牌色八奇

拍馬軍

鴈對珠

二姑把蚕

鰵入菱窠 蘇秦背劍 枰雙飛 雙脚

疊勝環兒 象戲八捷 象棋 背水陣

燈蛾獨立 雪夜擒戎 雙龍爭珠 老蚌

吸月 寒江獨釣 流星趕月 金鷄抱卵

妙曲八引 曲名 玉抱肚 後庭花 尾犯

傍粧臺 玉交枝 對玉環 三仙橋 三換

頭 刮鼓令 一曰大 夜行船 齊雲 圖社

八弄 毬 鞦韆搭 逆流水 勒馬膝

側有扎 一曰八 鵲踏枝 燈鎖腰 一曰疊

雙背肩拐

黃鶯落架

麗詞八調

詞名

鵲橋仙

喜遷鶯

漠魚兒

隔浦蓮

青

玉案

瑣窓寒

醉蓬萊

一曰醉春
一曰醉落魄

金

人捧露盤

手談八勢

圍棋

玉匣藏珍

金圭七聚

彩鳳翻身

金脫殼

猛虎

奔林

喜鵲轉枝

二士入桃源

右軍觀

鷺

樗丸八巧

打毬

卧捧斜插花

燕

尾斜插花

後楸掀過前

前楸翻過後

背身正捧

兩肩基兒

鴈點頭

背身側

捲簾

院爨八劇

雜劇

三拖旦

六分

界

琴家弄

看馬胡孫

纏三旦

牽簾

駱駝

調猿掛鋪

雙捉壻

嘉靖癸卯秋八月有姚某者徙居顧山鎮業腐

酒一日出其上世姚恭靖少師廣孝永樂十

年二月所得贈祖菊山父妙心祖母周母費

并封本身官誥五道貨于古塘王柳塘王膏

梁子不識姚少師為何許人僅取其裱錦軸

頭之類買之中玉璽誥文揭還携去余友人

雙涇周君聞之用秫米易而藏焉嗟嗟靖
難幃幄大黜炳炳于金匱間而當時龍章
卒為後世棄如敝屣豈適符色即是空之本
旨乎。

燈謎十謂朱門九不開滿頭風雪却回來歸家
懶覩妻兒面撲盡寒爐一夜灰一藥名常山砒霜

狼毒一病名喉閉傷寒
焰硝一病名暴頭火丹

河豚余邑中之所慣食余亦愛之近入城聞一
人家哭聲甚哀問之則以誤食河豚之有毒

者連死四人梅聖俞詩云炮煎膏矢所入喉
為鎗鉏又云皆言美無度誰謂死如麻真紀
實之言也余從此遂不敢食遇饌則每勸人
世間多美味省此一物不為少勿為蘇家口
語所誤悔之無及時亦有聞余言而輟箸者
有不謂然者余曰從若轉圜勝于墮塹蓋中
毒者多飲穢物解之聊借戲以警云偶得宋
時陳止齋傳良戒河豚賦錄之以廣余意焉
其文曰余叔氏食河豚以死余甚悲其能殺

人吾邦人嗜之尤切他魚余嘗恠問焉曰以其柔滑且甘也嗚呼天下之以柔且甘殺人者不有大於河豚者哉遂賦之物固有害人乎人之勝者智也牛能觸吾為之絡馬能蹄吾為之銜且轡也鳥喙之毒用之藥以治也虎豹搏且噬也機與穽足以備也蛟蜃可馱兮蛇虺翫斬可避也雖其質禍賊兮名彰莫余偽也是故防之疑兮待之懼也吁河豚柔滑其肌兮旨厥味也孰魚匪羞兮而柔以甘

人同嗜也曾謂其斃人亟兮孽肝膽慘腸胃
也人雖疑致死兮饋者弗忌也吁嗟乎物之
害人兮不在乎真可畏也凡蓄美以誘人兮
蓋中人之所利也余誠悅而喟兮彼則陰以
其恚也滅殘忍以為仁兮文嫵媚忌也甘我
以言兮鼠伺而狐覷也笑怡怡吾蠶兮弱婉
婉滅人之氣也富貴懷安吾鳩兮幣帛饔牢
吾餌也吁嗟乎愛者禍府兮所玩以易也兵
莫慘於貪兮干戈伏於不意也晉滅虞以璧

馬子商君以好囚魏也。莽詐忠以盜漢子。武
賊養以媚也。眇河豚其弗戒乎。欺天下者曰
得志也。吁嗟乎。君子泰安若。擲天下於一試
也。元貢玩齋魯客江陰集有記河豚云。大者
名青郎君。小者名班兒。今鮮知青郎君名。

邵文莊公寶測影臺考。按周禮以土圭之法測
日影。九立五表。其中表在陽城。即今登封東
南告縣舊治是也。平至其地。有二臺存焉。其
南一臺。琢大石為之。上狹下濶。高丈餘。廣半
於高中。樹一石碑。刻曰周公測影臺。臺北三

人所復有一臺約高三丈餘壘磚為之其北
之中為缺道深廣二尺許下列石為道直達
於北約五丈許石上為二小渠渠側刻尺寸
甚精密最北一石為二小竅以出水詢其土
人云故老相傳為量天尺又以為銅壺滴漏
考之縣志此名觀星臺亦周公所築然予見
其刻尺寸所書特今文耳恐非出於周公况
歷代曆書言尺度者亦未嘗言及陽城測星
臺尺蓋不可信恐惟石臺乃周公遺跡所謂

觀星臺者則後人因而建耳且其地嘗置金
昌府治又嘗置告縣治建斯臺者豈其時耶
又按禮疏四方之表各去中表千里予以禹
跡圖考之南表當在郢之北東表當在遼之
東北表當在肅之北西表當在華之西南終
南山之東今其地不知亦有遺跡在否

宣廟詠撒扇一首云湘浦煙霞交翠剡溪花雨
生香掃却人間炎暑招回天上清涼真帝
王之詩也

嘉靖二十三年甲辰春雨淋漓二麥萎黃十無
二三自四月不雨直至八月中間雖小雨數
次地方濕而燥日如火隨就乾烈溝洫揚塵
河港成裂禾苗盡稿米麥之價騰貴民不聊
生草根樹皮皆攘取充腹此等景象爾不幸
而親見之哉食榆樹皮前漢天文志河
平元年旱傷麥民食榆皮
陸文量菽園雜記云古諸器物異名龜其形
似龜性好負重故用載石碑螭物其形似獸
性好望故立屋角上徒索其形似龍而小性

好吼叫有神力故懸于鐘之上憲章其形似
獸有威性好囚故立於獄門上饕餮性好水
故立橋所蟋蟀形似獸鬼頭性好腥故用于
刀柄上蠐螬其形似龍性好風雨故用於殿
脊上螭虎其形似龍性好文彩故立於碑文
上金猊其形似獅性好火烟故立於香爐蓋
上椒圖其形似螺蛳楊升菴曰按尸子云法螺蚌而閉戶後漢書禮儀志殿以水德王故以螺蚌著信矣性好閉口故立
於門上今呼鼓了非也蚺蛟其形似龍而小

性好立險故立於護朽上

楊升菴曰唐韻拾音培注指頭也今

俗名護朽

鰲魚其形似龍好吞火故立於屋脊上

獸吻其形似獅子性好食陰邪故立門環上

金吾其形似美人首魚尾有兩翼其性通靈

不睡故用巡警出山海經博物志右嘗過倪

村民家見其雜錄中有此因錄之以備參考

如詞曲有門迎四馬車戶列八椒圖之句八

椒圖人皆不能曉今觀椒圖之名義亦有出

也然考山海經博物志皆無之李西涯懷麓

堂集云、龍生九子、不成龍、各有所好、囚牛、龍種、平生好音樂、今胡琴頭上刻獸、是其遺像、睚眦、平生好殺、今刀柄上龍吞口、是其遺像、嘲風、平生好險、今殿角走獸、是其遺像、蒲牢、平生好鳴、今鍾上獸紐、是其遺像、狻猊、平生好坐、今佛座獅子、是其遺像、霸下、平生好負重、今碑座獸足、是其遺像、狴犴、平生好訟、今獄門上獅子頭、是其遺像、負負、平生好文、今碑兩旁龍、是其遺像、蚩吻、平生好吞、今殿脊

獸頭是其遺像昔在弘治間

泰陵嘗令中官問龍生九子名目因憶少時往
往於雜書中見之倉卒不能悉具又莫知所
出以詢之羅編修玘玘僅疏其五六云得於
其師左叅政贊者止此又詢于吏部劉員外
績績以故冊來冊面備錄此語亦不知所從
出因據以復命余又得一處載虬螭好負重
今碑下石獸所述各不同俟正之博物君子
虬螭疑即前霸下

嘉靖二十四年正月十八日夜、楚世子英耀弒其父楚王、初世子病、王遣所愛宮人侍之、世子私焉、有娠、楚王怒、遂疎世子、及妃生幼子、陰有廢立之意、一日往世子堂、見其容瘁、曰、爾如此、何能繼我、不如學脩鍊長生、將王位素讓與弟、弟不失位、爾不失身、兩便也、世子是時、已蓄弒心矣、至今年正月十七日、宴三司、飲至三鼓、歡甚、出所有寶盃等、勸三司不醉不歸、次夜三鼓被弒、其跟随朱安等出城

聞之巡撫三司。次日世子以父病風暴卒訃。
長史官及內臣令史阿附之。時巡撫亦任其
差官赴京營幹。御史伊山象敏生從荊州急
回。遂奏劾之。由是世子械至京。自盡。長史內
臣俱斬。不待時。聞楚王貪酷已極。人無可柰
何矣。天為楚民報讐。乃假手其子。身弑子滅。
天定勝人之理也。此得之項既東
最的

宋理宗朝。淳熙六年。衢州孝廉七世孫中書省
奏名臣柴望。撰丙丁龜鑑。言丙午丁未。自古

多變厄者凡二十有一、為十卷、其言多驗、洪容齋五筆、亦載丙午丁未之變、而謂丁未之災、又慘於丙午、撫時憂事、搦管勒此、

陶宗儀有莫逆友曰邵亨貞、今輟耕錄首載募資刻版疏、是其筆也、邵公號見獨居士、余家藏其親筆文稿一冊、中有南村草堂記、誦之可以想見二公丰采、記云、自昔有道之士、能終身不汨名利、天下後世清議無異辭者、惟晉靖節先生、與吾宗康節先生、二人而已、二

公之子孫散處四海代不乏人。然能繼其高風偉行者。則未見其人也。吾宗諸老。往往追慕。未始不扼腕嗟嘆。自以不克遠紹先躅。是憾靖節去今代尤遠。然亦寥寥無聞者。豈皆冥然自晦於窮山絕域。而與世不相聞耶。予與陶君九成游。幾四十年矣。視其行無所矯揉。終身弗渝。九成生長浙水東。承平時。侍父宦游西州。既壯。屢經世變。弓旌纁帛之招。接踵境上。悉教然不答。既久益堅。唯耕藝讀書。

從容于逢掖顛沛之時漫浪于世道紛紜之際無隱士之名而潛合隱士之行方之同時之士趨競而合汙者有之困阨而失守者有之言與行違者有之能如九成之和動聲色全身而履道則不可得也吾嘗攷求吾宗之人可以追述康節者既未之見今觀九成出處殆可遠企靖節遺風為可慶也九成築草堂于泗溪之南林暇以余往過焉見其左右列琴瑟書冊前後多桑麻竹樹四顧皆平疇

遠水出戶則可覽觀江山之勝四時有耕釣、
蠶牧之營晨夕有讀書談道之樂遶屋種菊、
數十百本幅巾短褐逍遙其間與黃花同傲
霜露地備而心遠胷中所存不言而可槩見
人亦以為今代之靖節與余老矣九成亦逾
半百行將優游卒歲於草堂之下後之傳逸
民者其肯舍諸九成求余言為記既書以復
之且以歎吾宗之不競也戊午歲重陽日記
常無止菴張公洪宣德時以翰林修撰在家屋

散欲緝有東與東橋徐氏乞柴蓋之并羊一
牽乃縣令為鄉飲送者轉托與種竹人家換
竹作榻其東有三四十句余親得之惜未曾
錄失去此等高風今願為之執鞭而無從也
其諭緬甸宣慰那羅塔六書綽有使才不獨
有行有文

神仙粥方專治感冒風寒暑濕之邪并四時疫
氣流行頭疼骨痛發熱惡寒等症初得一二
三日服此即解用糯米約半合生薑五大片

河水二碗於砂鍋內煮一二滾次入帶鬚大
葱白五七个煮至米熟再加米醋半小盞入
內和勻取起乘熱吃粥或只吃粥湯亦可即
於無風處睡之出汗為度此以糯米補養為
君。姜葱散散為臣一補一發而又以酸醋飲
之甚有妙理蓋非尋常發表之劑可比也屢
用屢驗不可以易而忽之

湖廣鎮巡等官迎賀

武宗大駕親征江西凱旋帳詞是時余邑裕軒

夏公從壽為叅議此其代筆者存以見當年
時事云爾伏以春生秋殺妙闔闢於乾坤雷
厲風行廓清夷於江漢惟天討必加于有罪
肆王師豈出于無名功在一人歡騰萬口茲
蓋伏遇 欽差總督軍務後軍都督府威武
大將軍鎮國公朱英資神授駿德天成廟筭
無遺遠懾犬羊於徼外王猷允塞豈容狐鼠
於域中粵在洪都建有寧府 聖祖重屏翰
之計茅土攸分 累朝敦親睦之仁繼承不

替、宜 祖訓之永守、期宗社以同休、詎意茲
邦、是生惡胤、乃宸濠者、夙稟兇暴、少有豺狼
之聲、大肆烝淫、長為禽獸之行、攘奪良民、殆
遍、賊殺善類、孔多、招誘賊徒者、不翅萬衆、陰
謀不軌者、殆將十年、罪貫已盈、反形漸具、諫
臺交奏、宜加斧鉞之誅、聖德涵容、尚錫几
杖之賜、方遣官而降 勅、俾悔過以圖新、豈
梟獍之惡已成、顧蜂蟻之忱何在、偽傳制檄、
豈惟指斥乘輿、大興甲兵、直欲謀危社稷、遂

殺巡撫、首據省城、南康、九江皆被乘虛襲破、民廬市肆悉遭縱火焚燒、垂涎欲犯留都、染指已攻安慶、馳變告于一旦、法所不容、赫皇怒于九重、義所必討、敬告宗廟、肅將天威、即日臨朝、以誓師、匪徒推轂而分、閭六飛親御、舉鞭指江以西、五位暫離、伏劍從天而下、周之皇父、休父、戒旅陳行、唐之英公、衛公、前驅後繼、六軍齊奮、增耀日之威靈、萬馬不嘶、聽如山之號令、先聲至而逆醜褫魂喪魄、

義旗舉而元兇束手就擒、表天紀之必正、不
撓、信王師之有征無戰、有生大慰雲霓之望、
無辜咸脫水火之中、荆棘不生、允藉班師節
制、秋毫無犯、樂聞奏凱歡聲、邁成周之克定、
三監、政由冢宰、陋漢景之討平七國、兵屬條
侯、元功顯勒於鼎鐘、示永世而萬古不泯、
大駕早還於斧宸、敷文教而六合同春、某等
慙扈從莫效犬馬之勞、詩歌常武、叩行在不
勝葵藿之悃、祝擬華封、誠懼誠忭、稽首頓首、

謹獻詞曰一統山河調玉燭堯舜至仁先睦
族獨憐七國與三監祇今猶蹈前車覆赫然
天怒肅何須分閫還推轂誓六師一人自將
直指西江澳披堅執銳俱頗牧憑伏威靈
如破竹元兇就縛詔班師大功獨建歸黃屋
凱歌賡法曲懽騰億兆俱蒙福競嵩呼天長
地久永鎮綏荒服右調歸朝歡

順天府故官錦衣衛千戶李雄女孩李玉英謹
奏為明辨生寃以伸死憤以正綱常以還淳

俗事臣聞先王有言五刑以不孝為先四德以無義為恥又聞列女傳云以一身而係綱常之重者謂之德以一死而正綱常之重者謂之仁故竇氏有投崖之義氣索華有墜井之英風是皆所以振綱常以勵風俗流芳名於身後垂軌範於無窮也臣父李樵蔭襲百戶荷蒙聖恩以征西有功尋陞前職臣幼喪母遺臣姊妹三人有幼弟李承祖俱在孩提恩父見憐仍娶繼母焦氏存恤孤弱臣十

二歲遇

皇上嗣位、遍選才人、府尹以臣應選、禮部憫臣
孤弱、未諳侍御、戮臣寧家、父於正德十四年
七月十四日、征陝西、反賊與賊進戰陣亡、天
禍臣家、流離日甚、臣年十六、未獲結縭、姊妹
三人、伶仃無倚、標梅已過、紅葉無憑、是以窮
迫、瀝液形諸吟咏、偶有送春詩一絕云、柴門
寂寂鎖殘春、滿地榆錢不療貧、雲鬢霞裳伴
泥土、野花何似一愁人、又有別燕詩一絕云、

新巢泥滿舊巢空。泥滿疎簾欲掩遲。愁盡呢
喃終一別。盡堂依舊主人非。是皆感諸身心
形諸筆札。蓋有大不得已而為言者矣。柰何
母恩雖廣。弗察臣衷。但玩詩詞以為外通等
情。朝夕逼責。求死無門。逼舅焦榕拿送錦衣
衛。誣臣奸淫不孝等情。臣本女流。難騰口舌。
本官昧審事理。問擬劓罪重刑。臣只得俯伏
順從。不敢逆繼母之命。以重不孝之罪也。邇
蒙聖恩寬恤。特以天氣太炎。在監軍民未

獲蕞落、仍差審錄太監研審、凡有事在人冤、
許通行奏、欽此、欽遵、不得不具求生之路、以
昭決死之言、臣父雖武臣、頗知典籍、故臣雖
妾婦、亦得奉聞其遺教、况臣繼母、年方二十
有弟李亞奴、始生週歲、臣母欲圖親兒繼襲、
故當父方死之時、計令臣弟李承祖十歲孩
兒、親往戰場、尋父遺骨、蓋欲陷于非命、以圖
已之私也、幸賴皇天不昧、父靈不泯、臣弟得
父骸骨以歸、前計不成、忿心未息、巧將臣弟

李承祖、毒藥鴆死、肢解埋棄、將臣姊李桂英、
賣與權豪家為婢、名雖養贍、情實有謀、又將
臣妹桃英、沿街抄化、屏去衣服、稍有怨言、朝
夕拷打、今又將臣誣陷淫姦等情、臣縱不木
隣里、何不糾舉、又不曾經獲某人、乃以數句
之詩、尋風捉影、陷臣死罪、臣之死固無憾矣、
十歲之弟、果何罪乎、數齡之女、又何辜乎、臣
母之罪、臣不敢言、凱風有諫、臣當自責、臣之
死固不足惜、恐天下之為繼母者、得以肆其

妬忌之心凡為兒女者得以指臣之過也是
以一生而污風俗以一身而褻綱常也臣在
監日久有欺臣孤弱而興不良之心者臣撫
膺大慟舉監莫不驚惶 陛下俯察臣情將
臣所奏付諸有司明布各衙門知道將臣速
斬庶身無所苦免行露之霑濡魂有所歸無
青蠅之污穢仍將臣之詩句委勘有無淫奸
等情推詳臣母之心盡在不言之表則臣父
母之靈亦可慰之于地下而臣之義亦不可

掩于人聞矣。臣冒瀆 聖主，不勝祈死之至。
係明辨生寃，以伸死憤。事情不敢隱諱，謹具
本令妹李桃英賫奏以聞。奉 聖旨：這奴婦
事有可矜，着三法司會勘來說。奉 聖旨：李
承祖死於無辜，焦氏妬忌之心，罪實難容。依
律處斬。李玉英着錦衣衛選良才婚配。右疏
在嘉靖四年間一學究所抄者，余見而錄之。
分類夷堅志乙集五卷中載江陰民云：林敷明
甫說：紹興六年，寓居江陰時，淮上桑葉價翔。

湧有村民居江之洲中、去泰州如臯縣絕近、育蚕數十箔、與妻子謀曰、吾比歲事蚕、費至多、計所得不足取償、且坐耗日力、不若盡去之、戴見葉、貸之如臯、役不過三日、而享厚利、且無害、妻子以為然、乃以湯盡死、瘞諸桑下、悉取桑棹舟以北行、半道有鯉躍入、民取之、剖腹實以鹽、俄達岸、津吏登舟視稅物、發其桑、見有死者、民之厥子也、驚且哭、吏以為殺人、拘係之、鞠同舟者、皆莫知、問其所以來、民

具道本末、縣遣吏至江陰物色之、至其家、門
已閉、壞壁以入、寂無一人、試起瘞驗之、又其
妻也、體已腐敗矣、益証為殺妻子而逃、無以
自白、吏亦不敢斷、竟斃于獄、沈石田客坐新
聞七卷末、載蠶神報寃云、弘治庚申、太倉孫
廷慎行販安吉、往來皂林、見巡司獲盜三人、
其人是彼處大族伍氏家丁也、蓋其家每歲
畜蠶多、桑薄、飼之不繼、因棄蠶十餘筐、瘞之
土窖中、三人仍駕船往市桑葉、不得、舟還途

次忽一大鯉躍入舟中、約重數斤、三人喜其
罕得、載歸、旣主舟經皂林巡司、異其小船而
用兩櫓、急駕疑之、遂追捕、至檢其外、見頭倉
有人腿一、三人自相驚駭、巡司即縛解浙江
臬司、拷掠甚至、詰其身屍所在、三人不勝煨
煉、訴辨得魚之故、變異之端、主司不信、三人
者不得已而認之云、殺人身屍見埋在家隙
地內、主司即命吏卒人等、押至其家、妄指一
地、發之、正是瘞蚕之處、蠶皆不見、惟見一死

屍身軀完全、乃少一腿、事之符合、併家主供
抵罪、夫豈害蚕命數多、有此報冤耶、按此案
夷堅所志、大畧相同、豈太倉孫君、偶因蚕事、
遂緣飾舊聞、以誑石田、而石田信之耶、不然、
不應鯉魚躍舟、瘞蚕變屍之符如是也、後得
唐安定皇甫牧所撰三水小牘中云、唐咸通
庚寅歲、洛師大饑、穀價騰貴、民有殍於溝塍
者、至蠶月而桑多為蟲食、葉一斤直一錢、新
安縣慈澗店北村民王公直者、有桑數十株、

特茂盛、蔭翳、公直與其妻謀曰、歟、儉若此、家
無見糧、徒竭力於此、蚕尚未知其得失、以我
計者、莫若棄蚕、乘貴貨、棄可獲錢千萬、蓄一
月之糧、則接麥矣、豈不勝為餒死乎、妻曰、善
乃、攜錘坎地、養蚕數箔、瘞焉、明日凌晨荷桑
葉詣都市鬻之、三千文、市彘肩及餅餌以歸
至徽安門、門吏見囊中殷血、連洒于地、遂止
語之、公直曰、適賣桑得錢、市彘肉及餅餌貯
囊、無他也、請吏搜索之、既發囊、惟有人左臂

若新支解焉。群吏乃反接送于居守。居守命付河南府尹、正瑯琊王公凝、令綱紀鞠之。其款云：某瘞蚕賣桑葉市肉以歸，實不殺人。特請檢驗。尹判差所由監領，就村驗埋蚕處，所由領公直至村，先集鄰保，責手狀，皆稱實知。王公直埋蚕，別無惡跡，乃與村衆及公直同瘞蚕坑中，有箔角一死人，而闕其左臂，取得臂附之，宛然符合。遂復令公直詣府白尹，尹曰：王公直雖無殺人之辜，且有坑蠶之咎。法

或可恕情在難容。蚕者天地靈蟲。綿帛之本。故加勦絕。與殺人不殊。當自嚴刑以絕凶醜。遂命於市。杖殺之。使驗死者。則復腐蠶矣。今據小牘。則夷堅之說。正當時洪公門下所竄入唐事。以投其好者。當以小牘為的。餘皆係訛襲云。

西瓜可治暑疾甚效。種以牛糞結實大如斗。其種自洪忠宣使金虜移歸。極惡糯米撒上。易爛。凡瓜以鯨骨入之。則瓜盡壞。

武林舊事、泗水潛夫輯、正德中、一代巡在浙中、刻之、其跋謂泗水潛夫、不知為誰、夫周爰咨諏、代巡職也、抑咨之而無有知者乎、勝國時、周公密、楊公維禎、最博洽、著作甚富、其別號甚多、密字公謹、號草窓、凡弁陽老人、泗水潛夫、齊東野人、癸辛居士、皆其別見者也、維禎字廉夫、號鐵崖、凡鐵雅、鐵笛、鐵史、鐵龍、精鐵、仙鐵、龍仙伯、老鐵、東維子、抱遺老人、桃花夢、叟、錦窩老人、邊上梅、皆其別見者也、聊為志、

之、

嘉靖三十二年癸丑三月松江府同知張伸以
偏愛少妾楊媚酷虐其妻趙氏遂為妻所殺
遍身碎剝至五月上海縣因濱江無城廿六
夜倭寇數百突入街巷男婦殺死無算縣令
奔逃縣治周遭燒燼擄掠不可數計延及蘇
州太倉城下吳淞千戶所金山衛等處受害
大畧相同余江陰雖遠亦以近江為慮縣官
督民造城造兵器且募民兵救援太倉亦被

先數命聞之驚膽張同知殺死事余表姪嚴
某在彼親見歸說嚴又云松江府治徧地生
毛細如髮五色具備人人恠嘆

淮安周煒清波雜志十二卷其七卷中云宣和
奉使高麗詔路允迪傳墨卿為使介其屬徐
兢倣元豐中王雲所撰鷄林志為高麗圖經
稽考詳備物圖其形事為其說蓋徐素善丹青
也宣和末先人在歷陽雖得其圖但能抄
其文畧其繪畫乾道間刊于江陰郡齋者即

家間所傳之本圖亡而經存蓋兵火後徐氏
亦失元本

戒菴老人漫筆卷之三